

周

禮

正

義

周禮正義卷十九

瑞安孫詒讓學

凡建邦國以土圭土其地而制其域諸公之地封疆方五百里其食者半諸侯之地封疆方四百里其食者參之一諸伯之地封疆方三百里其食者參之一諸子之地封疆方二百里其食者四之一諸男之地封疆方百里其食者四之一土其地猶言度其地鄭司農云土其地但爲正四方耳其食者半公所食租稅得其半耳其半皆附庸小國也屬天子參之一者亦然故魯頌曰錫之山川土田附庸奄有龜蒙遂荒大東至于海邦論語曰季氏將伐顓臾孔子曰先王以爲東蒙主且在邦域之中是社稷之臣此非七十里所能容然則方五百里四百里合於魯

頌論語之言諸男食者四之一適方五十里獨此與今五經家說合耳立謂其食者半參之一四之一者土均均邦國地貢輕重之等其率之也公之地以一易侯伯之地以再易子男之地以三易必足其國禮俗喪紀祭祀之用乃貢其餘若今度支經用餘爲司農穀矣大國貢重正之也小國貢輕字之也凡諸侯爲牧正帥長及有德者乃有附庸爲其有祿者當取焉公無附庸侯附庸九同伯附庸七同子附庸五同男附庸三同進則取焉退則歸焉魯於周法不得有附庸故言錫之也地方七百里者包附庸以大言之也附庸二十四言得兼此四等矣疏凡建邦國者此建畿外五等邦國之法也職方氏說五等侯國之里數同云以土圭土其地而制其域者以土圭測景之法定邦國

之方位而正其疆域也戴震云土圭之灋不惟建王國用之封國必以度地以此知某國偏東偏西偏南偏北然後可定各地之分至啓閉其疆域廣輪之實亦於是分明不惑焉案戴說是也賈疏依千里而差一寸之率測其封域之里數云假令封上公五百里國北畔立八尺之表夏至晝漏半得尺五寸景與土圭等南畔得尺四寸五分其中減五分一分百里五分則五百里既非密率又事涉繁碎殆非經義云諸公之地封疆方五百里其食者半者此經所食者半及參之一四之一皆當依先鄭說據諸侯自食言之公五百里開方爲方百里者二十五卽二十五同食者半則十二同又五終之地也云諸侯之地封疆方四百里其食者參之一者四百里開方爲方百里者十六卽十

六同食者參之一則五同三成又三分成之一也云諸伯之地封疆方三百里其食者參之一者三百里開方爲方百里者九卽九同食者亦三之一則三同也云諸子之地封疆方二百里其食者參之一者二百里開方爲方百里者四卽四同食者四之一則一同也云諸男之地封疆方百里其食者四之一者百里開方爲方五十里者四食者亦四之一則二十五成也注云土其地猶言度其地者玉人土圭以致日以土地注云土猶度也俞樾云土度聲近通用書柴誓杜乃獲雍氏注引作敷乃獲說文支部敷讀若杜土之通作度猶杜之通作敷矣土方氏職日以土地相宅卽度地相宅也案俞說是也鄭司農云土其地但爲正四方耳者謂土地卽辨方之事也若土圭景短卽知

其國於四方爲近南景長卽知其國於四方爲近北之屬賈疏  
謂五百里四百里之等說未該云其食者半公所食租稅得其  
半耳其半皆附庸小國也屬天子參之一者亦然者賈疏云司  
農意以經云其食者半與參之一四之一皆自食其餘並入天  
子雖不云四之一司農意亦四分之三分入天子一分自食  
江永云先鄭謂其食者爲諸侯後鄭謂其食者爲天子以文勢  
言之土其地制其域凡云其者皆指侯國則其食亦當指諸侯  
先鄭之義爲長大司馬令賦上地食者參之二中地食者半下  
地食者參之一亦謂其可食者也司勳凡頒賞地參之一食亦  
謂受賞者食其參之一其餘以食民以供上也先鄭以其半爲  
附庸小國屬天子參之一者亦然蓋謂小國無附庸然亦當并

山川及不可食之地言之乃近密小國可食地少而虛寬之數多其猶下地萊二百畝亦所以優之與王昭禹云諸公之地方五百里其食者半若其半則山林川麓不可食者也以至侯伯子男之地亦各以是爲差州方千里其地不能無肥磽之辨凡以可食多者爲上諸公之地可食者半所謂上地也侯伯之地可食者三之一所謂中地也子男之地可食者四之一所謂下地也猶不易一易再易之地任民而已鄭錡方苞說略同案王說卽江氏所本皆足補二鄭之義國語鄭語史伯對鄭桓公曰王莽駟而食溱洧與此食字義正同五等侯國所食之地大多小少非徒地有廣狹蓋亦兼以肥磽制其衰等遂師云經牧其田野辨其可食者管子八觀篇云凡田野萬家之衆可食之地

方五十里可以爲足矣萬家以下則就山澤可矣萬家以上則去山澤可也彼野悉辟而民無積者國地小而食地淺也田半墾而民有餘食而粟米多者國地大而食地博也國策秦策黃歇說秦昭王曰隨陽右壤此皆廣川大水山林谿谷不食之地皆此經食字之塙詁也云故魯頌曰錫之山川土田附庸奄有龜蒙遂荒大東至于海邦者並闕宮篇文毛傳云龜蒙山也荒有也鄭箋云策命伯禽使爲君於魯加賜之以山川土田及附庸令專統之奄覆荒奄也大東極東海邦近海之國也引之者證魯有附庸也又引論語曰季氏將伐顓臾孔子曰先王以爲東蒙主且在邦域之中是社稷之臣者季氏篇文集解引孔安國云顓臾伏羲之後風姓之國本魯之附庸使主祭蒙山魯七



百里之封顓臾爲附庸在其域中故此引以證附庸在邦域中也云此非七十里所能容者隱駁今文五經家說也先鄭意附庸包於侯國封域假令魯封域止七十里則不能容附庸明其不可信也魯爲侯國卽依今文說亦當百里此云七十里者蓋別依今文春秋義白虎通義爵篇云殷家令公居百里侯居七十里是今文家又有侯七十里之說故先鄭據而破之云然則方五百里四百里合於魯頌論語之言者司農謂必如此經有方四百里五百里等國乃能容附庸是合於魯頌論語之言也云諸男食者四之一適方五十里者卽二十五成之地也云獨此與今五經家說合耳者賈疏云五經家謂若張苞何休孟子等皆以爲周法公侯方百里伯七十里子男五十里子男五十

里故男食五十里是與五經家說合若自子已上以百里七十里國於此經二百里已上四之一三之一不合故直舉男地而言論讓案王制云公侯田方百里伯七十里子男五十里不能五十里者不合於天子附於諸侯曰附庸孟子萬章篇春秋繁露爵國篇文並同白虎通義封公侯篇云諸侯封不過百里象雷震百里所謂雲雨同也七十五里差德功也此先鄭所謂今五經家說卽漢時今文經師之說也賈疏謂若張苞何休孟子等大宗伯疏亦云張苞周孟子何休等不信周禮張苞周蓋指張禹苞咸周氏張禹治今文論語苞周章句並出張侯論見何晏論語集解敘學而篇集解又引苞咸說千乘之國從王制義是二家皆傳今文論語公羊莊元年何注說二等國並依王

制義春秋公羊亦今文學也周禮爲古文之學故今文經師皆所不從今文之說蓋以王制孟子所說爲周制無二百里以上至五百里之國後鄭以王制爲虞夏殷之制周初因之周公制禮則改制如此經之說故王制注云此地殷所因夏得三等之制也殷有鬼侯梅伯春秋變周之文從殷之質合伯子男以爲一則殷爵三等者公侯伯也異畿內謂之子周武王初定天下更立五等之爵增以子男而猶因殷之地以九州之界尙狹也周公攝政致太平斥大九州之界制禮成武王之意封王者之後爲公及有功之諸侯大者地方五百里其次侯四百里其次伯三百里其次子二百里其次男百里所因殷之諸侯亦以功黜陟之其不合者皆益之地爲百里焉又云春秋傳曰禹會諸侯

於塗山執玉帛者萬國言執玉帛則是惟謂中國耳中國而言萬國則是諸侯之地有方百里有方七十里者禹承堯舜而然矣要服之內地方七千里乃能容之夏末既衰夷狄內侵諸侯相并土地滅國數少殷湯承之更制中國方三千里之界亦分爲九州而建此千七百七十三國焉周公復唐虞之舊域分其五服爲九其要服之內亦方七千里而因殷諸侯之數廣其土增其爵耳孝經說曰周千八百諸侯布列五千里內此文改周之法關盛衰之中三七之間以爲說也是鄭謂虞夏地大而國多故爵土爲二等以百里七十里五十里爲限殷地狹於虞夏而國少故仍夏制周初亦然至周公致太平斥大九州之界同於虞夏而封國之數猶因殷舊地增國少故得廣

土增爵有五百里四百里之封此後鄭通周官王制孟子以調停其說之意王制孔疏引五經異義云古春秋左氏傳說禹會諸侯於塗山執玉帛者萬國唐虞之地萬里容百里地萬國其侯伯七十里子男五十里餘爲天子閒田此亦以百里七十里五十里等爲虞夏之制卽後鄭所本先鄭之意或當與彼同也今攷明堂位說周公封曲阜地方七百里晏子春秋內篇雜下晏子曰昔吾先君太公受之營上爲地五百里史記漢興以來諸侯年表云封伯禽康叔於魯衛地各四百里並與此經合管子輕重乙篇云天下之旁天子中立地方千里兼霸之壤三百有餘里此諸侯度百里負海子男者度七十里雖與此經小異然亦不以百里爲大國足徵周制必不如孟子所說況孟子又

言齊魯之封儉於百里則所說三等之國自謂一代恆法非周  
初沿殷權宜之制可知鄭四代損益之說不能通於孟子王制  
孔疏引鄭荅臨頤云孟子當紂王之際王制之作復在其後蓋  
亦知二書後出與周初典法不無歧異也江永云諸侯之地土  
田爲實封若附庸在其封內雖爲社稷臣而不得有其地名山大  
澤有不以封者其餘山川藪澤斥鹵磽塉之地與夫城郭宮  
室溝塗皆不可食者統而計之大國宜有數百里小國亦不下  
百里此周禮與孟子王制所以不能同周禮就其虛寬者言之  
孟子王制惟舉土田實封耳又云左傳襄二十五年子產對晉  
之辭曰昔天子之地一圻列國一同自是以衰此言與孟子王  
制合與周禮違當觀其所以立言之意此因晉人責其侵小而

晉人自有兼數圻之失故子產不欲舉大國虛寬大數而惟舉一同之制以顯兼數圻之多其言有所爲也王制則述孟子者也不然孟子生近齊魯豈真不知齊魯始封尙有餘地而云儉於百里哉案江說略木王安石陳祥道於義得通金鶚黃以周亦並謂孟子王制所言三等之封百里七十里五十里者除山川附庸言之此經五等之封五百里四百里三百里二百里百里爲兼山川附庸言之與江說略同竊謂孟子謂齊魯初封儉於百里者自是故言其小以鐫切七國大抵春秋以後人說列國封域大小多非其實如昭二十五年左傳楚沈尹戌曰若敖蚡旨至於武文土不過同國語楚語白公子張說齊桓晉文曰其入也四封不備一同而至於有畿田以屬諸侯以楚武文及

桓文初得國時疆域攷之斷不止此數楚語韋注亦云方欲善  
美之故尤小焉此與子產孟子之言足相比例矣又後鄭依王  
制說附庸在方四百里三百里二百里百里之外故職方氏注  
亦謂州封五等國二百一十其餘以爲附庸亦不若先鄭說以  
附庸在封域內之允也云玄謂其食者半參之一四之一者土  
均均邦國地貢輕重之等者後鄭以其食者半參之一四之一  
等爲天子所食之貢故引土均均地貢以破先鄭義其說實非  
也云其率之也公之地以一易侯伯之地以再易子男之地以  
三易者此鄭爲比况以申其食者爲貢入天子之說謂公以下  
貢有輕重猶之齊民投地有一易再易等之率耳非謂眞以此  
三等地封諸侯也賈疏云其民受地有一易再易故此諸侯之



地據貢入天子以耕之者入諸侯以易而不耕者故以公之地貢半似二百畝佃半也侯伯之地三之一貢入天子似家三百畝佃百畝留二分似荒廢者也子男之地以三易四之一貢與天子似家得四百畝佃百畝留三分似三百畝不耕者也民但家無三易之地直以況義耳云必足其國禮俗喪紀祭祀之用乃貢其餘者此中大國貢重小國貢輕之義土均云禮俗喪紀祭祀皆以地燼惡爲輕重之法而行之故鄭依而言也賈疏云後鄭意釋公國貢半已下漸少之意言公受地廣稅物多但留半自用卽足其國禮俗喪紀及畜積之用故以半爲餘貢入天子其侯伯受地差少則其稅亦少故三之二留自用乃足其國以一分爲餘貢入天子其子男受地又少其稅轉少故四分

之乃足其國亦以一分爲餘貢入天子云若今度支經用餘爲  
司農穀矣者漢書食貨志云大司農陳臧錢經用賦稅既竭不  
足以奉戰士顏注云經常也此注疑指漢時諸侯王國亦以常  
用所餘儲爲司農穀故舉以爲況司勳先鄭注云若今時候國  
有司農少府錢穀是也賈疏以度支經用爲國家喪紀所用餘  
入天子殊誤司農官詳天官敘官疏云大國貢重正之也小國  
貢輕字之也者此亦申地貢大重小輕之義左昭十三年傳云  
同盟於平丘子產爭承曰昔天子班貢輕重以列列尊貢重周  
之制也卑而貢重者甸服也鄭伯男也而使從公侯之貢杜注  
云列位也公侯地廣故所貢者多甸服謂天子畿內其職貢者  
鄭蓋兼據彼文爲說正讀與征同字之者左昭十六年傳子產

曰非不能事大字小之難又三十年傳云字小在恤其所無孔  
疏引服虔云字養也江永云諸侯固各有貢然九貢皆貨賄服  
物不貢粟米則天子不食諸侯之地不可謂之食制其貢亦惟  
以其所有耳豈舉其地之半參之一四之一而責其貢哉後鄭  
正之字之其言雖美非實事也案江說是也地貢雖大重小輕  
而此經其食者實當爲諸侯自食大國食多小國食少所以示  
尊卑隆殺之差非所謂正之字之也云凡諸侯爲牧正帥長及  
有德者乃有附庸者後鄭以附庸爲加賜在封地之外亦破先  
鄭說也賈疏云案王制云五國以爲屬屬有長十國以爲連連  
有帥三十國以爲卒卒有正二百一十國以爲州州有伯伯卽  
牧也此牧正帥長皆是有功諸侯乃得爲之有功卽有附庸又

諸侯有德雖不爲牧正帥長亦得有附庸故鄭總云諸侯牧正帥長及有德者乃有附庸焉論讓案鄭王制注云伯帥正亦長也凡長皆因賢侯爲之殷之州長曰伯虞夏及周皆曰牧牧卽大宰建牧立監之牧彼注云以侯伯有功德者加命作州長謂之牧是有功德者並得爲牧周牧亦通稱伯不專屬殷制也詳大宰及大宗伯疏云爲其有祿者當取焉者謂諸侯有國無祿其爲牧正帥長者則宜別優以祿故加賜附庸使取其貢賦以當祿也云公無附庸者賈疏云以其天子畿方千里上公五百里地極故無附庸也云侯附庸九同伯附庸七同子附庸五同男附庸三同者賈疏云以其侯有功進受公地但公五百里開方之方百里者五五二十五侯四百里開方之四四十六加九

同則爲二十五同與公等故知侯附庸九同伯地三百里三三而九加七同則爲十六同與侯等故知伯附庸七同也其子有功進受伯地加五同與伯等男有功受子地男本一同加三同與子等開方之皆可知云進則取焉退則歸焉者謂有功而進則取此附庸入邦國有罪而退則歸之於王別給有功者賈疏謂退則歸焉者謂爲閒田者非云魯於周法不得有附庸故言錫之也者釋魯頒之義賈疏云魯雖爲侯爵以其王子母弟雖爲侯伯畫服如上公受五百里之地與上公等成王以周公制典法之勳賜魯以侯伯子男四等附庸云地方七百里者包附庸以大言之也附庸二十四言得兼此四等矣者明堂位云成王以周公爲有勳勞於天下是以封周公於曲阜地方七百里

鄭彼注云上公之封地方五百里加魯以四等之附庸方百里者二十四并五五二十五積四十九開方之得七百里賈疏云魯本五百里四面各加百里四五二十即二十同四角又各百里爲四同故云附庸二十四言周公有德兼侯九同伯七同子五同男三同故云兼此四等矣凡言同者皆百里地百里則爲國周法不滿百里乃爲附庸今皆名附庸爲同者但附庸實不滿百里積集附庸成同并數之矣假令男附庸三同附庸國則多矣據成同而言三耳自餘五同七同已上其義可知也案鄭意當如賈說據春秋繁露得國篇說附庸字者方三十里名者方二十里人氏者方五十里是附庸不得有百里之國鄭約言以便計算耳但魯地方七百里乃作記者之侈說非其實也依

此經及史記言之魯爲侯爵則地當方四百里附庸在封域之中論語有明文先鄭說自不可易後鄭欲傳合明堂位七百里之文遂謂魯本受五百里地同於上公又於封地之外別增附庸二百里以充其數殆未足馮矣凡造都鄙制其地域而封溝之以其室數制之不易之地家百畝一易之地家二百畝再易之地家三百畝都鄙王子弟公卿大夫采地其界曰都鄙所居也王制曰天子之縣內方百里之國九七十里之國二十有一五十里之國六十有二此蓋夏時采地之數周未聞矣春秋傳曰遷鄭焉而鄙留城郭之宅曰室詩云嗟我婦子曰爲改歲人此室處以其室數制之謂制土甸之屬王制曰凡居民量地以制邑度地以居居民地邑民居必參相得鄭司農云不易之地歲

種之地美故家百晦一易之地休一歲乃復種地薄故家二百晦再易之地休二歲乃復種故家三百晦疏凡造都鄙制其地域而封溝之者此畿內稍縣置三等采邑井田授地之法也縣師云凡造都邑量其地辨其物而制其域是制域爲縣師所職司徒則以法命之其封溝則封人匠人等爲之詳前疏賈疏云案載師職家邑任稍地小都任縣地大都任置地又下文小司徒職云四丘爲甸四甸爲縣四縣爲都家邑二十五里小都五十里大都百里是造都鄙制其地域也云以其室數制之者賈疏云其室在都邑之內而云制之者依其城內室數於四野之中制地與之謂若九夫爲井四井爲邑四邑爲丘四丘爲甸四甸爲縣四縣爲都之等是也沈彤云凡造都鄙制其地域而封



溝之謂先量地定域也則都邑之大小正繫其地以其室數制之乃卽域內之室數以爲縣鄙之屬使多寡與地邑相得民寡則徙之入民多則徙之出非計其室數以制都邑也案沈說是也云不易之地家百畝者晦釋文作畝云本亦作古晦字案說文田部作晦云六尺爲步步百爲晦从田每聲重文畝晦或从田十久畝卽畝之俗體經例皆作晦不作畝陸本誤此辨都鄙授地之法載師縣師注以此不易一易再易之制爲六鄉之法與此經注並不合誤也都鄙亦當有餘夫其授田以遂人三等田萊之率推約之蓋亦當上地田二十五晦中地田五十晦下地田七十五晦各視其正夫所受之田以四分之一爲餘夫之地經不言者文不具也 注云都鄙王子弟公卿大夫采地者

大宰注云都鄙公卿大夫之采邑王子弟所食邑周召毛聃畢  
原之屬在畿內者詳彼疏云其界曰都鄙所居也者大宰注義  
同謂所居治之邑曰鄙其大都百里小都五十里家邑二十五  
里竟界所包通曰都也賈疏云三等采地皆有城郭是其鄙所  
居也據其四境卽是其界曰都云王制曰天子之縣內方百里  
之國九七十里之國二十有一五十里之國六十有三此蓋夏  
時采地之數者鄭王制注云縣內夏時天子所居州界名也殷  
曰畿詩殷頌曰邦畿千里維民所止周亦曰畿畿內大國九者  
三公之田三爲有致仕者副之爲六也其餘三待封王之子弟  
次國二十一者卿之田六亦爲有致仕者副之爲十二又三爲  
三孤之田其餘六亦待封王之子弟小國六十三大夫之田二

周禮正義 禮十九

五百四十七

十七亦爲有致仕者副之爲五十四其餘九亦以待封王之子弟三孤之田不副者以其無職佐公論道耳雖其致仕猶可卽而謀焉是鄭據彼稱縣內定爲夏時采地之數也知周曰畿者據職方氏云方千里曰王畿是也云周末聞矣者賈疏云案洛誥傳云天下諸侯之來進受命於周退見文武之尸者千七百七十三諸侯注云八州州立二百一十國畿內九十三國云畿內九十三國卽此都鄙之數有文矣而云未聞者以無正文故疑焉案書傳云千七百七十三諸侯與王制數同故鄭從之畿內九十三國卽依王制說也此注以彼爲夏制周所不用故云未聞蓋兩正義本異賈合爲一失之又王制孔疏引鄭書注及鄭志答趙商說夏初諸侯萬國畿內四百國此謂夏王畿千里

無鄉遂而盡以爲五十里之國此本非塙論又不謂是周法特  
小雅甫田孔疏乃據彼說謂周制郊內亦封諸侯尤謬所不足  
論也引春秋傳曰遷鄭焉而鄆留者賈疏云案桓十一年夏五  
月鄭伯寤生卒秋七月葬鄭莊公九月宋人執鄭祭仲公羊云  
祭仲者何鄭相也古者鄭國處于留先鄭伯有善於鄆公者通  
乎夫人以取其國而遷鄭焉而野留莊公死已葬祭仲將往省  
于留墜出于宋宋人執之野鄆不同者何鄭所見傳異也案玄  
發墨守云鄭始封君曰桓公者周宣王之母弟國在宗周畿內  
今京兆鄭縣是也桓公生武公武公生莊公遷居東周畿內國  
在鄆鄆之間今河南新鄭是也武公生莊公因其國焉留乃在  
陳宋之東鄭受封至此適二世安得古者鄭國處于留祭仲將

往省留之事乎是鄭君不從公羊引之者直取鄆所居爲義其  
鄭居留之事猶自不取也所謂文取而義不取也詒讓案鄭引  
公羊傳鄆留何本作野留蓋嚴顏之異何注云野鄆也則鄆野  
文異而義同云城郭之宅曰室者爾雅釋言云宮謂之室釋名  
釋宮室云室實也人物實滿其中也引詩云嗟我婦子曰爲改  
歲入此室處者爾風七月篇文引之者詒室在城郭內也鄭彼  
箋云曰爲改歲者歲終當避寒氣而入所穹室僅戶之室而居  
之云以其室數制之謂制丘甸之屬者明采地制井田異於鄉  
遂比閭鄰里之制云丘甸之屬舉中言之明上關縣都下關井  
邑也室數者謂若采地無公田則一井九家卽爲九室邑四井  
則三十六室丘甸邑則百四十四室甸四丘則五百七十六室

縣四甸則二千三百四室都四縣則九千二百十六室其邦國制公田則一井入家卽爲八室邑則三十二室丘則百一十八室甸則五百十二室縣則二千四十八室都則八千一百九十二室此以田室分配通率計之如是若城郭聚居則當視地之險夷大小而制之或一井一邑特爲一城或數井數邑合爲一城皆不能預定都鄙城制經無明文攷周書作雒篇云大縣立城方王城三之一小縣立城方王城九之一都鄙不過百室以便野事彼大縣當卽大都小縣當爲家邑不及小都者舉大小以該中文不具也以差計之小都計之當方王城六分之一然則王城方九里大都城蓋方三里小都城蓋方一里有半家邑城蓋方一里古者民宅不過五畝大都三里之城以營百室餘

地尙多無不容之患也引王制曰凡居民量地以制邑度地以居民地邑民居必參相得者證以室數制之之法鄭彼注云得猶足也案王制此文謂若量地方一里則爲制井而居民八家地方二里則爲制邑而居民三十二家之類其有盈闕方斜及不爲井者皆以率消息之使參相得此邑通大小言之不定爲四井之邑也制邑之法詳里宰疏賈疏謂欲見邑在城外居在城內說誤鄭司農云不易之地歲種之地美故家百畝者漢書食貨志云民受田上田夫百畝歲耕種者爲不易上田國語齊語韋注云易變易也凡田或種穀或休生轉更迭變易故謂之易案易卽遷人之禁不易地美既不須更休故有用無萊家正得百畝無副益云一易之地休一歲乃復種地薄故家二百畝

者謂一田一萊也漢食貨志云中田夫二百晦休一歲者爲守  
易中田賈疏云謂年別佃百晦廢百晦論議案呂氏春秋樂成  
篇云魏氏之行田也以百畝鄰獨二百畝是田惡也近此一易  
之田也云再易之地休二歲乃復種故家三百晦者謂一田二  
萊也漢食貨志云下田夫三百晦休二歲者爲再易下田賈疏  
云以其地薄年年佃百晦廢二百晦三年再易乃徧故云再易  
也惠士奇云呂氏春秋任地云凡耕之大方力者欲柔柔者欲  
力息者欲勞勞者欲息棘者欲肥肥者欲棘急者欲緩緩者欲  
急渴者欲燥燥者欲濕易之之謂也土勞多瘠故必休之而土  
乃屬其所謂休者非弃之也春萌而斫其新夏夷而芟其陳秋  
穫而敗其實冬耜而剗其根則有雜氏殺草之法以治其地土



各異物物各異宜則有革人土化之法以物其地水歸其澤澤  
草所生則有稻人揚芟之法以作其地如是而休一歲二歲然  
後復種則土加肥美其收數倍於歲墾之田故曰易江永云田  
休一歲二歲不耕所以養地力也南方無休不耕之田非盡由  
地美亦由糞田之力勤而糞田實勞且費北方糞田尤艱故有  
休田之法論讓案此上中下三等田制與遂人六遂田制略同  
此所謂易即彼所謂萊但彼上地猶有萊五十畝非全不易者  
與此小異耳又此二等投田之法古說以爲即爰田故漢食貨  
志說民受田三等云歲更耕之自爰其處左傳十五年傳晉作  
爰田孔疏引服虔孔晁皆云爰易也實取以田易其疆畔國語  
晉語作較田韋注引賈逵亦訓較爲易義與服孔同說文走部

二云超超田易居也爰輟超字並通公羊宣十五年何注云司空  
謹別田之高下善惡分爲三品上田一歲一墾中田二歲一墾  
下田三歲一墾肥饒不得獨樂饒墾不得獨苦故三年一換土  
易居孟子滕文公篇死徙無出鄉趙注云徙謂爰土易居平肥  
饒也漢書地理志云秦孝公用商君制輟田顏注引張晏云周  
制三年一易以同美惡商鞅始割列田地開立阡陌令民各有  
畜制孟康云三年爰土易居古制也末世浸廢商鞅相秦復立  
爰田上田不易中田一易下田再易爰自在其田不復易居也  
食貨志曰自爰其處而已是也案張孟說爰田之制周秦不同  
其以三等授田及墾數多少之差古今是一但周制三等受田  
之人彼此相易當年耕上田百畝二年耕中田二百畝之百畝

三年耕下田二百畝之百畝至四年而仍耕上田百畝是以易  
居爲爰田有不易而無不爰秦制則受上田者常耕此不易之  
百畝受中田者常自換耕二百畝二年而周受下田者常自換  
耕三百畝三年而周彼此更不相易是以休田爲爰則爰卽此  
所謂易上田不易卽無爰中下田乃有爰也許何服趙諸家釋  
周制並同其說但依孟說則漢志所云自爰其處者卽秦法之  
爰田不易居然漢制實以爲周井田之法則班自謂周制不易  
居與許何諸說不同孟康不辨以爰土易居爲古制則仍是許  
何義非班情也今攷小司徒說六鄉田制云上地家七人中地  
家六人下地家五人注謂上地所養者畝下地所養者畝是周  
之授田本以人數爲等衰蓋家口之衆寡與受田之肥磽兩相

劑而不則非所謂肥饒獨樂饒塉獨苦也授田既視人數則不得分年易居儻如許何諸說則是家七人受上地者次年換受中地更次年又換受下地將不足以給其養田廬改易紛擾無已更無論矣然則自爰不易居當以漢志爲正張所謂周制殆不足信蓋所說秦制乃近周制耳乃分地職奠地守制地貢而頒職事焉以爲地灋而待政令分地職分其九職所宜也定地守謂衛麓虞侯之屬制地貢謂九職所稅也頒職事者分命使各爲其所職之事疏乃分地職者以下並通冢邦國都鄙爲文侯國采邑皆有此諸事也云以爲地法而待政令者地法卽在地之官法大司徒修建爲書以授載師使職之政令謂王之政令凡頒授徵斂之事皆是也注云分地職分其九職所宜也

者賈疏云上經既授上中下地此經云分地職故知分地職者是分九職所宜九職則大宰云一日二農生九穀是也所宜謂若孝經注高田宜黍稷下田宜稻麥之類是也案賈說卽上土宜之法非鄭意也九職所宜當是農圃在平地藪牧在山澤各隨所宜授之云定地守謂衡麓虞候之屬者均人土均注義同司市營驛小史弓人注並讀與爲定職幣注云與定也故經云與注直云定不讀爲定者以互見於彼諸職文不具也釋文引劉昌宗與亦音定賈疏云案昭二十年左氏傳晏子云山林之木衡麓守之澤之荏蒲舟藪守之藪之薪蒸虞候守之海之鹽蜃祈望守之注云衡麓舟藪虞候祈望皆官名也守之令民不得取之不其利時景公設此守以致疾故晏子所非非其不與

民同鄭引之者以證地守之官若然此地官唯有衡虞無舟鮫  
祈望者此周禮舉其大綱左氏言其細別故詳略不同云制地  
貢謂九職所稅也者若閭師任農以耕事貢九穀等卽太宰九  
職之人所貢也又土均亦云以均地貢注云地貢諸侯之九貢  
彼下文有邦國都鄙故別以太宰九貢爲釋與此異云頒職事  
者分命使各爲其所職之事者說文支部云頒分也頒卽頒之  
段字分命者謂命民各脩當職之事職亦卽九職及下經云頒  
職事十有二是也以荒政十有二聚萬民一曰散利二曰薄征  
三曰緩刑四曰弛力五曰舍禁六曰去幾七曰眚禮八曰殺哀  
九曰蕃樂十曰多昏十有一曰索鬼神十有二曰除盜賊荒凶  
年也鄭司農云救饑之政十有二品散利貸種食也薄征輕租

稅也弛力息絲役也去幾關市不幾也管禮掌客職所謂凶荒殺禮者也多昏不備禮而娶昏者多也索鬼神求廢祀而修之雲漢之詩所謂靡神不舉靡愛斯牲者也除盜賊急其刑以除之饑饉則盜賊多不可不除也杜子春讀蕃樂爲藩樂謂閉藏樂器而不作立謂去幾去其稅耳舍禁若公無禁利管禮謂殺吉禮也殺哀謂省凶禮疏以荒政十有二聚萬民者謂救荒之政也云三日緩刑者易祿云緩刑若朝士於邦凶荒則慮刑貶是也詒讓案周書雜匡篇云大荒刑罰不脩管子入國篇云歲凶康弛刑罰赦有罪蓋重罪頌繫之輕罪則赦之云五日舍禁者謂弛關市山澤之禁王藻云年不順成山澤列而不賦鄭彼注云列之言遮列也雖不賦猶爲之禁不得非時入也若然此

云舍禁者謂其以時入者若非時入之禁仍不舍也 注云荒  
凶年也者大宰注同賈疏云案襄公二十四年冬大饑穀梁傳  
云五穀不升爲大饑一穀不升謂之饑二穀不升謂之饑三穀  
不升謂之饑四穀不升謂之康五穀不升謂之大侵大侵卽大  
饑一也又案廩人云人食四鬴上也三鬴中也二鬴下也若食  
不能人二鬴則令移民就穀不能人二鬴之歲卽是大饑年也  
此云荒政者亦據大凶年爲義案均人云凶札無力政財賦此  
既據大饑猶云薄征者此經雖主大饑兼記一穀二穀不熟之  
歲故有輕稅也此鄭云荒凶年則荒與凶一也案大司樂大札  
大荒大凶荒凶別者其實凶荒是一故宗伯云以荒禮哀凶札  
是凶荒不異司樂凶荒別文者以凶爲凶年以荒爲荒亂兼見



斯義故凶荒別文也案大司樂無大荒之文賈說未詳鄭司農  
二云救饑之數十有二品者廣雅釋詁二云品式也謂救饑所行之  
政有此十二事豫設爲品式也二云散利貸種食也者廣雅釋詁  
二云貸借也左襄二十九年傳二云宋饑司城子罕請於平公出公  
粟以貸周書羅匡篇二云大荒舍用振穹開廩同食管子入國篇  
二云歲凶康人訾厲多死喪散倉粟以食之又揆度篇二云無食者  
子之陳無種者貸之新卽貸種食之事旅師掌三粟亦二云散其  
利後鄭注二云以作事業日利貸種食卽所以作事業與先鄭此  
注義亦相成賈疏二云謂豐時斂之凶時散之其民無者從公貸  
之或爲種子或爲食用至秋熟還公據公家爲散據民往取爲  
貸故二云散利貸種食二云薄征輕租稅也者前注二云征稅也賈疏

云案司稼云巡野觀稼出斂法注云豐年從正儉有所殺若今  
十傷二三實除減半是輕租稅也云弛力息繇役也者說文弓  
部云弛弓解也引申之解釋繇役亦謂之弛此經凡施舍字鄭  
並讀爲弛與此弛力義同賈疏云案均人云豐年則公均用三  
日中年則公均用二日無年則公均用一日此云弛力謂人食  
不能二鬴之歲則移民就穀無力役之事故均人又云凶札則  
無力政財賦是也云去幾關市不幾也者幾謂苛察之詳宮正  
及司關疏賈疏云此後鄭不從以其雖凶年猶幾呵但去稅而  
已云胥禮掌客職所謂凶荒殺禮者也者葉鈔釋文引注胥作  
省阮元云注訓殺禮明胥爲省殺之意故經作胥注作省陸所  
見注是省禮今本注皆改作胥禮非案阮說是也此經作胥注

作省蓋亦經用古字注用今字之例省卽省之借字釋名釋天  
云省省也公羊僖二十二年何注云殺省也是省殺同爲省減  
之義故引掌客文爲證但彼專據省賓禮故後鄭補其義賈疏  
謂後鄭不從先鄭非省互詳大司馬疏云多昏不備禮而娶昏  
者多也者賈疏云昏禮有六并有立纁束帛凶荒爲昏不可備  
行此禮使有女之家得減口數有男之家易得其妻故娶昏者  
多也詒讓案周書雜匡篇云大荒嫁娶不以時孔注云不以時  
秋冬也媒氏會男女合之又毛詩衛風有狐序云古者國有凶  
荒則殺禮而多昏會男女之無夫家者所以蕃育人民也又召  
南云野有死麕白茅包之有女懷春吉士誘之傳云凶荒則殺  
禮猶有以將之義並與此經合云索鬼神求廢祀而修之者修

經注例並用借字作脩唯此作修疑誤淮南子似真訓高注云求索也是索求義同以凶荒恐舊在祀典今或廢缺鬼神怨恫而爲此災故搜索修舉而祭之覲以弭其災者呂氏春秋懷寵篇云問其叢社大祠民之所不欲廢者而復興之是也此廢祀無不搜索其內外常祀自有祈禱之祭可知又案此索鬼神謂在常祀之外者與黨正國索鬼神而祭祀爲蜡祭異又大藝流別引尙書大傳說十二月各有索祀於四正四隅之禮於經無文與此索廢祀亦不同也云雲漢之詩所謂靡神不舉靡愛斯牲者也者詩大雅文蒐箋云靡無也言王爲旱之故求於羣神無不祭也無所愛於三牲毛傳亦云國有凶荒則索鬼神而祭之正本此經至左莊二十五年傳云凡天災有幣無牲杜注云

天災日月食大水也是彼謂暫時遇災祈請之禮其大荒禱祀  
自牲幣兼有賈疏謂天災之時祈禱無牲災成之後卽有牲體  
失之云除盜賊急其刑以除之饑饉則盜賊多不可不除也者  
賈疏云上文旣言緩刑其餘盜賊用急刑乃上下文爲妨故鄭  
云饑饉則盜賊多不可不除故須急其刑以除之云杜子春讀  
蕃樂爲藩樂謂閉藏樂器而不作者段玉裁云蕃藩義異說文  
蕃艸茂也藩屏也此易其字以易其義鄭從之也賈疏云經云  
蕃者是蕃育之字故讀從藩是藩閉之字案大司樂云六凶大  
戒令弛縣注云弛釋下之若今休兵鼓之爲彼又云日月食四  
鎮五嶽崩諸侯薨令去樂注云去樂藏之引春秋傳曰壬午猶  
釋萬入去籥萬言入則去者不入藏之可知彼之二文云令弛

縣據路寢常縣之樂釋下之去樂據廟中祭時暫縣之樂去而  
藏之此云藩樂謂閉藏樂器據廟中祭祀藏去樂器而不作若  
然祭祀不作明路寢常縣亦釋下之互見其義詒讓案曲禮云  
歲凶年穀不登君祭事不縣此息廟中之樂也又玉藻云年不  
順成天子食無樂此息路寢常縣之樂也周書羣臣篇云大荒  
國不稱樂此通廟寢之樂言之也但此荒政藩樂宜與大司樂  
大司弛縣相當彼上文天地大災乃云去樂去樂與弛縣有輕  
重之異則此藩樂非卽彼去樂矣竊謂弛縣者謂弛金石之樂  
不必藏去此藩樂者亦謂弛縣之後藩蔽不令人見不必盡藏  
去也若去樂則盡斂所有樂器藏之府庫不徒藩之而已杜讀  
藩爲藩甚塙而釋爲閉藏則與去樂義混賈不能辨遂以藩樂

與去樂爲一疏矣云玄謂去幾去其稅耳者賈疏云破先鄭之義全不幾後鄭必直去其稅猶幾之者案司關云國凶札則無門關之征猶幾明知司農之義非王氏詳說云門關與市異司市曰國凶荒札喪則市無征而作布去幾者市之去幾也門關所以防姦人之出人不幾得乎案先鄭說與司關文迕後鄭破之是也但幾是幾察去稅不可以言去幾後鄭說仍不可通王說得之蓋經云去幾自指國中市墜言之大凶門關當詰姦盜不宜無幾若國市爲貨賄所聚固宜去幾以來商賈司市之作布與此去幾皆通商恤民之事也云舍禁若公無禁利者毛詩大雅雨無正傳云舍除也賈疏云案左傳襄公九年冬公會晉侯伐鄭同盟于戲晉侯歸謀所以息民魏絳請施舍輸積聚以

皆自公以下苟有積者盡出之國無滯積亦無困人公無禁利  
杜注云與民共是也云省禮謂殺吉禮也者省亦當作省賈疏  
云此破先鄭之義司農引掌客職凶荒殺禮證省禮後鄭之意  
凶荒殺禮是總目之言不專於吉禮鄭知省禮專是吉禮者以  
其下有殺哀與省禮相對故知省禮專是吉禮也案賈說非也  
後鄭亦同先鄭訓省爲殺但先鄭引掌客文未備故更足成之  
吉禮對凶禮而言凡五禮內吉賓嘉諸禮通殺禮不徒於掌客  
殺賓禮雜記云凶年祀以下牲殺梁襄二十四年傳云大侵之  
禮鬼神禱而不祀周書羅匡篇云年饑舉祭以薄大荒有禱無  
祭禮無樂是殺吉禮也殺梁傳云大侵弛侯范注云弛廢也侯  
射侯也廢侯不燕射周書大匡篇云大荒國不鄉射是殺嘉禮



也云殺哀謂省凶禮者虞人注云殺猶減也公羊何注訓殺爲省謂減省喪禮趨簡易也周書羅匡篇云大荒喪禮無度祭以薄資又大匡篇云哭不留日庶人不獨葬是殺哀之事也以保息六養萬民一曰慈幼二曰養老三曰振窮四曰恤貧五曰寬疾六曰安富保息謂安之使蕃息也慈幼謂愛幼少也產子三人與之母二人與之饌十四以下不從征養老七十養於鄉五十異養之屬振窮拊揀天民之窮者也窮者有四曰矜日寡日孤日獨恤貧貧無財業累貸之寬疾若今癰不可事不葬卒可事者半之也安富平其縣役不專取疏以保息六養萬民者以下並平時安養民之政不關凶荒之事大戴禮記千乘篇云司徒成長幼老疾孤寡以時通于四疆管子八國篇說九惠之教

亦與此六事略同云二曰養老者謂養庶人之老王制云司徒  
養耆老以致孝是也羅氏養國老及外養酒正槁人云養耆老  
並通養四等之老遣人養老孤則又卽司門死政之老並與此  
異 注云保息謂安之使蕃息也者敘官注云保安也又前注  
云蕃蕃息也息蕃義同民必安而後能蕃息故以保息連言云  
慈幼謂愛幼少也者說文心部云慈愛也乂部云幼少也釋名  
釋言語云慈字也字愛物也月令仲春養幼少存諸孤云產子  
三人與之母二人與之餼者國語越語云越王句踐命人生丈  
夫二壺酒一大生女子二壺酒一豚生三人公與之母生二人  
公與之餼韋注云母乳母也餼食也鄭以周法無文故引彼爲  
況管子入國篇云凡國都皆有掌幼士民有子子有幼弱不勝

養爲累者有三幼者無婦征四幼者盡家無征五幼又予之祿受一人之食能事而後止此之謂慈幼亦其事也云十四以下不從征者賈疏云案鄉大夫職國中七尺野自六尺皆從征案論語云可以託六尺之孤注云六尺謂年十五則十五從征十四以下不從征可知亦是愛幼之事也云養老七十養於鄉五十異糧之屬者賈疏云案王制云五十養於鄉六十養於國七十養於學彼謂大夫士也王制又云凡三王養老皆引年注云已而引戶校年當行復除也老人衆多非賢者不可皆養故食貨志云七十已上上所養也此云七十養於鄉亦謂有賢行者也五十異糧者是王制文禮記常法庶人食稷士兼食黍大夫又加以粱今雖庶人至五十或與士大夫同食黍粱故云異糧

案王制云五十異糧六十宿肉七十貳膳八十常珍九十飲食  
不離寢膳飲從於遊鄭彼注云異糧也此不備引故云之屬以  
眩之依賈義則庶人之老當七十養於鄉八十養於國九十養  
於學校大夫士之老養遲二十年故鄭引王制而易其文王制  
孔疏引盧植王肅說謂五十養於鄉卽養庶人之老非鄭義也  
羣書治要引此注作七十養於學則疑據王制改與賈本不同  
又管子入國篇云凡國都皆有掌老年七十已上一子無征二  
月有饋肉八十已上二子無征月有饋肉九十已上盡家無征  
日有酒肉死上其棺槨勸子弟精膳食問所欲求所嗜此之謂  
孝老亦卽養庶人之老之事云振窮拊捄天民之窮者也窮者  
有四曰矜曰寡曰孤曰獨者釋文云拊捄本亦作拯救職幣注

周禮正義

禮十九

三

五百四十八

云振猶拊也說文手部云振舉救也拊上舉也引易曰拊馬壯吉今易明夷爻辭拊作拯漢書董仲舒傳顏注云拊古救字是拊拯救字同左昭十四年傳分貧振窮杜注云振救也賈氏述注拊亦作救疏云案王制云老而無妻者謂之矜老而無夫者謂之寡少而無父者謂之孤老而無子者謂之獨此四者天民之窮而無告者也皆有常饘鄭依此而言論語案王制云司徒恤孤獨以逮不足管子五輔篇云衣凍寒食飢渴匡貧糴振罷露資乏絕此謂振其窮義亦通於此云恤貧貧無財業稟貸之者後注云恤振憂貧者說文禾部云稟賜穀也賈疏云案旅師云凡用粟春頒而秋斂之注云困時施之饑時收之是其恤貧之法云實疾若今瘥不可事不第卒可事者个之也者葉鈔

釋文瘡作瘡宋婺州本同案說文尸部云瘡罷病也瘡卽瘡之  
省小司徒注云廢疾謂瘡病也案荀子王制篇云五疾上收而  
養之材而事之官施而衣食之兼覆無遺楊注云五疾病聾跛  
瘡斷者侏儒管子入國篇云凡國都皆有掌養疾聾盲喑啞跛  
躄偏枯握遞不耐自生者上收而養之疾官而衣食之殊身而  
後止此之謂養疾莊子人間世篇說支離疏止上有大役則支  
離以有常疾不受功上與病者粟則受三鍾與十束薪是周時  
寬疾不徒舍役又給養矣鄭引漢法者孔廣森云漢書高帝紀  
如淳注云律高不滿六尺二寸已下爲罷瘡是但以人癯矮者  
通謂之瘡若有瘡疾者別謂之瘡不可事其可事者雖不服戎  
猶任城道之役食貨志日常有更賦罷瘡咸出謂瘡可事者也

案孔說是也。筭卒卽漢書高帝紀之更賦。顏注引如淳云更有三品有卒更有踐更有過更古者正卒無常人皆當迭爲之一月一更是爲卒更也。貧者欲得願更錢者次直者出錢願之月二千是爲踐更也。天下人皆直戍邊三日行者便住一歲一更諸不行者出錢三百入官官以給戍者是爲過更也。此云不筭卒卽不出更賦可事半之謂出更賦之半也。賈疏謂不筭計以爲士卒失之又案管子度地篇云閭其民有錮病不可作者疾之可省作者半事之。此與漢注正同云安富平其繇役不專取者賈疏云言繇役均平又不專取則富者安以本俗六安萬民一曰燬宮室二曰族墳墓三曰聯兄弟四曰聯師儒五曰聯朋友六曰同衣服本猶舊也美善也謂約極攻堅風雨攸除各有

攸宇族猶類也同宗者生相近死相迫連猶合也兄弟昏姻嫁娶也師儒鄉里教以道藝者同師曰朋同志曰友同猶齊也民雖有富者衣服不得獨異疏以本俗六安萬民者此卽上文十二教以俗教安則民不偷之事云一日媼宮室二曰族墳墓者周書大聚篇云男女有婚墳墓相連民乃有親六畜有羣室屋旣完民乃歸之管子揆度篇云君終歲行邑里其人力同而宮室美者良萌也力作者也脯一一束酒一石以賜之卽媼宮室族墳墓之事云三曰聯兄弟者釋文云一本作聚兄弟阮元云鄭訓連於兄弟上則作聚者非案阮說是也呂氏春秋上農篇云苟非同姓農不出御女不外嫁以安農也此卽聯兄弟之事

注云本猶舊也者廣雅釋詁云本始也始與舊義近本俗者謂



各安其舊俗也云美善也者士喪禮注同經作媿注作美者亦經用古字注用今字之例也廣韻五旨云美媿同錢大昕云媿古美字此字不見於說文古文微與尾通堯典孽尾史記作字微論語微生畝漢書作尾生曄媿从敝當與媿通詩誰侑予美韓詩美作媿說文女部有媿字則該乎媿矣案錢說是也說文女部云媿順也順善義亦相近云謂約桮攻堅風雨攸除各有攸字者約小雅斯干文彼序云斯干宣王考室也詩云約之闢闕桮之橐橐風雨攸除烏鼠攸去君子攸芋毛傳云約束也鄭箋云約謂縮版也桮謂摺土也賈疏云桮謂築之橐橐用力是其約桮攻堅攸所也能使風雨所除宇居也君子小人各有所居引之者證美宮室也經云媿宮室明不使華美故以攻堅解

之王引之云鄭注約舉詩辭攸字卽攸芋也鄭君注禮時用韓詩蓋韓詩芋作宇云族猶類也同宗者生相近死相迫者淮南子似真訓高注云族類也此族墳墓卽墓大夫令民族葬之法注云族葬各從其親是也族葬蓋以先祖居中子孫以昭穆居左右所謂生相近死相迫也互詳墓大夫疏云連猶合也者此從今字讀聯爲連也大宰八法三曰官聯先鄭注云聯讀爲連古書連作聯是聯連古今字凡物相連屬則合并故連引申之亦訓合也云兄弟皆姻嫁娶也者賈疏云案爾雅釋親云父之黨爲宗族母與妻黨爲兄弟則兄弟之名施於外親爲正又案喪服記兄弟皆在外邦及與兄弟居彼皆據同宗小功已下知此兄弟是婚姻非是同宗者見上云族墳墓是同宗明此兄弟

施於外姓婚姻故爾雅又云婦之黨爲昏兄弟夫婦相名亦爲兄弟故曾子問曰不得嗣爲兄弟是以知兄弟是昏姻也詒讓案詩小雅黃鳥敘箋云刺其以陰禮教親而不至聯兄弟之不固孔疏引此經注而釋之云是謂夫婦爲兄弟也夫婦而謂之兄弟者列女傳曰執禮而行兄弟之道何休亦云圖安危可否兄弟之義故比之也案孔說未核此經兄弟謂異姓兄弟也與調人兄弟之讎從父兄弟之讎大宗伯以服膺之禮親兄弟之國專指兄弟者異夫婦有兄弟之道因之外親相謂爲兄弟故釋親云婦之黨爲婚兄弟之黨爲姻兄弟郭注云古者皆謂婚姻爲兄弟公羊僖二十五年傳云宋蕩伯姬來逆婦其言來逆婦何兄弟辭也何注云宋魯之間名結婚姻爲兄弟穀梁宣

十年傳云公娶齊齊由以爲兄弟喪服總麻三月章云姑之子  
鄭注云外兄弟也此婚姻兄弟也釋親又云從母之男子爲從  
母舅弟喪服總麻三月章云從母昆弟又云舅之子鄭彼注云  
內兄弟是母黨之兄弟也異姓兄弟當兼此數者孔偏據夫婦  
爲釋非經義又案此兄弟謂外親蓋通於尊卑之稱服問云有  
從無服而有服公子之妻爲公子之外兄弟注云爲公子之外  
祖父母從母總麻是凡外親尊屬亦得稱兄弟不必倫敘相當  
矣云師儒鄉里教以道藝者者卽大宰九兩之師以賢得民儒  
以道得民者也賈疏云以其鄉立庠州黨及遂皆立序致仕賢  
者使教鄉閭子弟鄉閭子弟皆相連合同就師儒故云連師儒  
也云同師曰朋同志曰友者白虎通義二綱六紀篇云朋者黨

也友者有也禮記曰同門曰朋同志曰友司諫疏引鄭論語注公羊定四年徐疏引倉頡篇並與逸禮同論語學而皇疏云同處師門曰朋同執一志爲友然則同門與同師文異義同云同猶齊也者毛詩小雅車攻傳云同齊也墨子經上篇云同異而俱之於一也云民雖有富者衣服不得獨異者賈疏云士已上衣服皆有采章庶人皆同深衣而已故云民雖有富者衣服不得獨異並皆齊等也詒讓案後漢書王符傳李注引尚書大傳云古之帝王必有命民能敬長矜孤取舍好讓者命於其君然後得乘飾車駟馬衣文錦未有命者不得衣不得乘乘衣者有罰春秋繁露服制篇云散民不敢服雜采百工商賈不敢服狐貉刑餘戮民不敢服絲玄纁此亦同衣服之一端與正月之吉

始和布教于邦國都鄙乃縣教象之漢于象魏使萬民觀教象  
挾日而斂之乃施教灋于邦國都鄙使之各以教其所治民正  
月之吉周正月朔日也司徒以布王教至正歲又書教法而縣  
焉疏正月之吉始和布告于邦國都鄙者自此至職末並大司  
徒當官專領之職事所謂官常也此以周正建子之月吉日布  
教於天下和當讀爲宣詳大宰疏云乃縣教象之漢于象魏使  
萬民觀教象者教象之法卽十二教及鄉三物之類司徒於布  
教之日卽縣教象於象魏使萬民觀之也天子象魏在庫門亦  
詳大宰疏云乃施教灋于邦國都鄙使之各以教其所治民者  
賈疏云若據邦國使諸侯教所治民若據都鄙則使公卿大夫  
教所治民 注云正月之吉周正月朔日也者大宰注義同云

司徒以布王教者賈疏云案大率注云帝王治之事於天下此不言天下注文略邦國都鄙則亦天下也云至正歲又書教法而縣焉者歸以乃縣教象之法以下爲正歲夏正建寅月之事與小司徒云正歲則帥其屬而觀教法之象爲一然與經承正月之吉者不合其說非也詳大率疏令五家爲比使之相保五比爲閭使之相受五閭爲族使之相葬五族爲黨使之相救五黨爲州使之相調五州爲鄉使之相賓此所以勸民者也使之者皆謂立其長而教令使之保猶任也救救凶災也賓賓客其賢者故書受爲授杜子春云當爲受謂民移徙所到則受之所未則出之又云閭當爲糾謂糾其惡立謂受者宅舍有故相受寄託也賈疏謂禮物不備相給足也閭二十五家族百家黨五

百家州二千五百家鄉萬二千五百家疏令五家爲比使之相保者此制六鄉比伍之法也與遂人六遂法同而名異鄉民相聚爲小部始於一比五家比長治之五家家數既少居又相比有罪過不容不知故使相保任比長云五家有舉奇衰則相及因平時相保故有罪過則相及矣云五比爲閭使之相受者一閭二十五家閭胥治之比止五家不能成城邑則鄉邑蓋自二十五家爲始既同處一邑則宅舍得相容受以居比長云五家相受遂官都長亦同則相受不定二十五家經各舉一端事實通也云四閭爲族使之相葬者一族百家族師治之相葬謂有喪葬則四閭之人會助其執紼下棺實土之事族師云以相葬埋鄉師云族共喪器既夕禮云窆實土三主人拜鄉人雜記云



鄉人五十者從反哭四十者待盥坎荀子禮論篇亦云庶人之  
喪合族黨勸州里是也云五族爲黨使之相救者一黨五百家  
黨正治之相救謂以力相振助也孟子滕文公篇云鄉田同井  
守望相助疾病相扶持亦相救之事賈疏云民有凶禍者使民  
相救助云五黨爲州使之相屬者一州二千五百家州長治之  
相屬謂以財相補給也云五州爲鄉使之相資者一鄉萬二千  
五百家爲一總部鄉大夫治之國語齊語云管子制國以爲二  
十一鄉五家爲軌十軌爲里四里爲連十連爲鄉則以二千家  
爲一鄉與此經萬二千五百家爲一鄉家數迥殊非周制也相  
賓卽鄉飲云三年則大比攷其德行道藝而興賢者能者鄉老  
及鄉大夫帥其吏與其衆寡以禮禮賓之注云以鄉飲酒之禮

禮而賓之又先鄭注云賓敬也敬所舉賢者能者案彼眾寡卽鄉內之民有賢能則相與會集賓敬之也 注云此所以勸民者也者謂此經六事雖官施其令而實則皆勸民自相爲之事也云使之者皆謂立其長而教令使之者長卽鄉吏謂大司徒令其長長又各以大司徒之教令使其所治之民也云保猶任也者說文人部云保養也任保也保本訓養引申爲相保任之義管子大匡篇云吾權任子以死生尹注云任保也方言郭注云保言可保信也此五家爲比亦使之相保信不爲惡若大司徒云使州里任之云救救凶災也者謂有凶災之事相與拯救也云賓賓客其賢者者卽後文賓興之事謂有賢者則以鄉飲酒之禮賓客尊敬之也云故書受爲授杜子春云當爲受者據

族師云使之相保相受與此文同士師亦云掌鄉合州黨族閭比之聯使之相安相受故杜依之改字徐幹中論譴交篇連此經作相憂蓋形近而誤段玉裁云此與典婦功同但此經文已易彼經文未易而出故書於注全書體例不必畫一也徐養原云典婦功注以授爲聲之誤然周禮受字故書多作授古者授受通用掌葛以權度受之故書亦或爲授云謂民移徙所到則受之所去則出之者鵬冠子王欽篇說制邑理都之法云若有所移徙去就家與家相受人與人相付與人姦物無所穿竄是民移徙有相受之法也賈疏云案比長職云五家相受相和親與此文同皆謂一閭之內無出入之法比長職又云徙於國及郊則從而授之注云徙謂不使其居也或國中民出徙郊或

郊民入徙國中彼是出鄉閭外與此閭內自相容受不同故後  
鄭易之以爲宅舍有故相受寄託解之詒讓案杜說與鷄冠子  
合義亦可通至此長所云授者謂官與官相授非民間自相授  
受之事與此不相涉也云闕當爲糾者據州長云正月之吉各  
屬其民而讀法以考其德行道藝而勸之以糾其過惡而戒之  
又遂官鄰長云掌相糾相受此上亦有相受之文故杜依彼二  
文讀闕爲糾也段玉裁云漢時小篆蓋無闕字故杜易其字如  
易軒爲軼之比鄭君則取從貝周爲說所謂就其字之聲類考  
訓詁据祕逸也鄉師闕萬民之難隄鄭司農云闕讀爲周急之  
周說文無闕字許意蓋謂周是闕非其實論語周字是假借周  
禮闕是正字孟子作用不從貝丁晏云周糾聲相近說文木部

棚讀若斗是其例也云謂糾其惡者鄭長注云相糾相舉察是也後鄭以相關義自可通故不從杜說云立謂受者宅舍有故相受寄託也者此從杜讀而義微異說文受部云受相付也謂不安其宅舍以人物相付託容受也云購者謂禮物不備相給足也者一切經音義引字林云購贍也鄉師購先鄭讀爲周詩大雅雲漢篇靡人不周毛傳云周救也月令開府庫出幣帛周天下注云周謂給不足也周購古今字禮物不足謂家貧不能給昏喪之禮則同州之人出私財以給足之云閱二十五家以下者賈疏云案此經五家爲比五州爲鄉轉相增故其家數可知程瑤田云鄉凡萬二千五百家如此者六綜計之受地凡七萬五千家也頒職事十有二于邦國都鄙使以登萬民一曰稼穡

二曰樹藝三曰作材四曰阜蕃五曰飭材六曰通財七曰化材  
八曰斂材九曰生材十曰學藝十有一曰世事十有二曰服事  
鄭司農云稼穡謂三農生九穀也樹藝謂園圃有草木作材謂  
虞衡作山澤之材阜蕃謂藪牧養蕃鳥獸飭材謂百工飭化入  
材通財謂商賈阜通貨賄化材謂嬪婦化治絲枲斂材謂臣妾  
聚斂疏材生材謂閒民無常職轉移執事學藝謂學道藝世事  
謂以世事教能則民不失職服事謂爲公家服事者立謂生材  
養竹木者疏頌職事十有二于邦國都鄙使以登萬民者頌訓  
分詳前疏賈疏云大司徒主天下人民之數故頌下民之職事  
十有二條於天下邦國及畿內都鄙使以登成萬民此經不言  
鄉遂及公邑者舉外以包內司徒親主鄉遂公邑頌之可知云

一日稼穡者賈疏云已下卽大宰九職大宰既掌之此又重掌者以大宰尊官總知其數此司徒是主民之官親自頒行義各有異也江永云職事十有二稼穡至生材卽大宰之九職其學藝世事服事此三職非生材之人案江說是也大宰任民主於理財故止有九職此官主於教民故十二職通頒之以鄉大夫職參考之學藝世事卽賢能服事卽服公事三者皆有復故爲九職民貢所不及矣云二曰樹藝者藝石經作藝與下學藝字同今從宋本作藝阮元謂唐人之例樹藝字作藝道藝字作藝是也上文辨十有二壤之物而知其種以教稼穡樹藝字亦作藝然依說文則樹藝學藝字並當作藝藝藝皆藝之俗 注卽司農云稼穡謂三農生九穀也者自稼穡至生材先鄭皆取大

宰九職爲釋敘官注云種穀曰稼說文禾部云穀可收曰穡毛詩魏風伐檀傳云種之曰稼斂之曰穡故以種穀爲稼穡云樹藝謂園圃育草木者大宰育作毓此作育者亦用今字也宋本及俗本並作毓非樹藝者種果木蔬草之通稱賈疏據前注以藝爲種黍稷則與稼穡文複非也並詳前疏云作材謂虞衡作山澤之材阜蕃謂藪牧養蕃鳥獸飭材謂百工飭化入材者並與大宰文同上文云以阜人民以蕃鳥獸此以阜蕃專屬鳥獸者上注云阜猶盛也蕃蕃息也盛與息義相成故此兼阜言之云通財謂商賈阜通貨賄者財與貨賄義通說文貝部貨賄同訓財詳大宰疏云化材謂嬪婦化治絲枲者絲枲卽女工所用之材故云化材云斂材謂臣妾聚斂疏材者與大宰文同云生



材謂閒民無常職轉移執事者賈疏云司農之意此閒民在第九當大宰九日閒民無常職故以閒民解生材也但周公制禮大宰任民無常職於此頒職事不可頒無常職使民行之故後鄭易之以爲養竹木解之江永云先鄭得之閒民執事於農工商賈虞衡之家皆所以生材後鄭謂養竹木者非是案江說是也閒民雖無常職而轉移執事卽是其職故大宰列之九職此列之十二職事明非無職也賈疏駁先鄭謂頒職事不可頒無職事誤云學藝謂學道藝者大司樂凡有道有德者使教焉後鄭注云道多才藝者案學道藝謂學士也道藝同訓經有兼言道藝者宮正及卿大夫諸文是也有單言道者道卽兼藝大宰及保氏大司樂諸文是也此經又單言藝藝亦卽兼道亦詳宮

正疏云世事謂以世事教能則民不失職者據前十二教經爲  
釋蔣載康云世事累世專業相傳凡巫醫卜筮諸藝事與前十  
二教世事別以農工商賈及士已見於前也江永說同案江蔣  
說是也王制云祝史射御醫卜及百工凡執技以事上者不貳  
事不移官彼執技自百工外並此所謂世事也先鄭及賈疏並  
謂此與前十二教之世事同但彼世事總指士農工商四民言  
之此十二職一稼穡五飭材六通財十學藝四民已包舉無遺  
則世事不得通四民言與彼微異也云服事謂爲公家服事者  
者與鄉大夫服公事者義同賈疏云謂若府史胥徒庶人在官  
者是公家服事者也云立謂生材養竹木者者大宰注云生猶  
養也賈疏云此後鄭破司農之義案大宰事典云以生萬民小

宰事職云以養萬民則知生爲養山虞林衡別官則知此生材  
養竹木在於平地林衡所掌是也案養竹木已賅於三日作材  
中不當別爲賡事後鄭及賈說非也以鄉三物教萬民而賓興  
之一曰六德知仁聖義忠和二曰六行孝友睦婣任恤三曰六  
藝禮樂射御書數物猶事也興猶舉也民三事教成鄉大夫舉  
其賢者能者以飲酒之禮賓客之既則獻其書於王矣知朋於  
事仁愛人以及物聖通而先識義能斷時宜忠言以中心和  
不柔善於父母爲孝善於兄弟爲友睦親於九族婣親於外  
親任信於友道恤振憂貧者禮五禮之義樂六樂之歌舞射五  
射之法御五御之節書六書之品數九數之計疏以鄉三物教  
萬民而賓興之者此卽六鄉大夫賓興賢能之事上文云五州

爲鄉使之相賓鄉三物者教鄉學之官法大司徒頒之六鄉之吏使教於鄉庠州序黨序及四郊虞庠之等有此三事也大戴禮記王言篇云昔者明王之治民有法必別地以州之分屬而治之然後賢民無所隱暴民無所伏使有司口省如時考之歲誘賢焉則賢者親不賢者懼漢書食貨志說里序之教云其有秀異者移鄉學於庠序庠序之異者移國學於少學此所賓興卽賢能秀異鄉民之三物克備者也云一日六德知仁聖義忠和二日六行孝友睦婣任恤者師氏注云德行內外之稱在心爲德施之爲行案師氏云以三德教國子一日至德以爲道本二日敏德以爲行本三日孝德以知逆惡教三行一日孝行以親父母二日友行以尊賢良三日順行以事師長彼三德與此

周禮正義 禮十九

卷八

五百四十八

六德全異三行亦唯孝友與此大行同又大司樂云以樂德教國子中和祇庸孝友大師亦謂之大德彼中和卽此忠和而孝友又取之三行並與此不同蓋教本多術此官通教萬民與大司樂教大學師氏教小學各舉一端亦互相備也云二曰六藝禮樂射御書數者與保氏同御羣書治要引作馭與保氏五馭字同是也此經例凡馭車字作馭侍御字作御二字較然不同石經及宋以來刻本並誤 注云物猶事也者亦引申之義小爾雅廣詁云物事也云與猶舉也者遂大夫大司馬注並同廣雅釋詁云興舉也鄉大夫注云變舉言興者謂合衆而尊寵之是也云民三事教成鄉大夫舉其賢者能者以飲酒之禮賓客之既則獻其書於王矣青鄉大夫云三年則大比攷其德行道

藝而興賢者能者鄉老及鄉大夫帥其吏與其眾寡以禮禮賓之厥明鄉老及鄉大夫羣吏獻賢能之書于王彼注釋以禮禮賓之云以鄉飲酒之禮禮而賓之故此注亦舉鄉飲酒爲說云知明於事者說文口部云知詞也又白部云飭識詞也凡論德者並飭之段字隸省作智羣書治要引此經注並作智釋名釋言語云智知也無所不知也白虎通義情性篇云智者知也獨見前聞不惑於事見微知著也云仁愛人以及物者說文人部云仁親也白虎通義情性篇云仁者不忍也施生愛人也莊子天地篇云愛人利物謂之仁大玄經玄樞云同愛天下之物無有偏私故謂之仁云聖通而先識者說文耳部云聖通也毛詩邶風凱風傳云聖睿也洪範睿作聖傷孔傳云於事無不通謂

周禮正義 禮十九

三百四十七

之聖文獻通考郊社考引五行傳思心之不容是謂不聖鄭注云心明日聖白虎通義聖人篇云聖者通也道者聲也道無所不通明無所不照聞聲知情案依鄭義此聖德卽明達之稱與知德略同但知者事至不惑聖則博通先識耳鄉飲酒義云仁義接賓主有事俎豆有數曰聖彼注亦訓爲通卽此義並與聖神之聖異也賈疏云案襄二十二年臧武仲如晉兩過御叔御叔在邑將飲酒曰焉用聖人何休云說左氏傳者曰春秋之志非聖人孰能脩之言夫子聖人乃能脩之御叔謂臧武仲爲聖人是非獨孔子玄箴之曰武仲者述聖人之道魯人稱之曰聖今使如晉過御叔御叔不說學見武仲而兩行傲之云焉用聖人爲左氏傳載之者非御叔不說學不謂武仲聖與孔子同若

然此云聖亦與武仲同是皆述聖人之道云義能斷時宜者若  
中庸云義者宜也白虎通義情性篇云義者宜也斷決得中也  
云忠言以中心者大戴禮記曾子大孝篇云忠者中此者也賈  
子道術云愛利出中謂之忠國語周語云考中度衷爲忠說文  
心部云忠敬也從心中聲又中部云中內也此注依聲爲訓言  
內盡心之敬是爲忠也大司樂中和注云中猶忠也二字互訓  
與此注同云和不剛不柔者大司樂注云和剛柔適也春秋繁  
露循天之道篇云夫德莫大於和而道莫正於中中者天地之  
美達理也聖人之所保守也詩云不剛不柔布政優優此非中  
和之謂與董子以不剛不柔通屬中和鄭君以不剛不柔專屬  
和者彼中和通言此中和爲六德之二義訓各別故鄭分釋之



也云善於父母爲孝善於兄弟爲友者大司樂注義同爾雅釋訓云張仲孝友善父母爲孝善兄弟爲友賈子道術云子愛利親謂之孝兄敬愛弟謂之友師氏云友行以尊賢良與此注及爾雅不同者內據親屬則曰兄弟外據朋友則曰賢良義得互含不相妨也云睦親於九族者說文目部云睦目順也一日敬和也坊記云睦於父母之黨鄭注云睦厚也賈疏云堯典云九族既睦是睦親於九族也九族者上至高祖下至玄孫旁及總麻之內也案賈說九族與尙書釋文引馬鄭說同蓋卽約鄭書注義後漢書班固傳李注引鄭書注亦云睦親也云姻親於外親者說文女部云姻姻家也女之所因故曰姻重文姻猶文姻從開此經作媼注作姻蓋亦經用古字注用今字之例詩邶風

燕燕箋及羣書治要引經並作姻爾雅釋親云婿之父爲姻左  
傳五年傳江黃道柏方睦於齊皆弦姻也杜注云姻外親也案  
姻本爲外親之名引申之親於內外親亦謂之姻賈子新書傳  
職篇云天子不姻於親戚不惠於庶民賈疏云上云睦施於九  
族明此姻是親於外親也左傳云士踰月外姻至亦據外親之  
等外親者則妻族母族是也云任信於友道者詩邶風燕燕箋  
云任以恩相親信也大戴禮記文王官人篇觀其任廉盧注云  
任以信相親也史記季布傳集解引孟康云信交道曰任賈疏  
云謂朋友有道德則任信之故論語云信則人任焉是也云恤  
振憂貧者者前注云恤謂災危相憂說文心部云恤憂也攷也  
鄭中庸注云振猶收也云禮五禮之義者據下經及保氏大宗

伯文五禮通駭吉凶其節文隆殺各有精義若禮記射義燕義之等是也云樂六樂之歌舞者亦據下經及保氏大司樂文云射五射之法御五御之節書六書之品數九數之計者並據保氏文御並當依保氏經注作取賈疏云書言品者形聲處事差品不同數言計者有多少筭計案五禮以下名義並詳保氏疏以鄉八刑糾萬民一曰不孝之刑二曰不睦之刑三曰不嫺之刑四曰不弟之刑五曰不任之刑六曰不恤之刑七曰造言之刑八曰亂民之刑糾猶糾察也不弟不敬師長造言訛言惑眾亂民亂名改作執左道以亂政也鄭司農云在謂朋友相任恤謂相憂疏以鄉八刑糾萬民者此卽十二教以刑教中則民不遠之事鄉八刑刑之行於鄉中者司徒掌六鄉故兼掌其刑大

司寇五刑三曰鄉刑是也云一日不孝之刑者孝經云五刑之屬三千而罪莫大於不孝大司寇鄉刑亦云上德糾孝故此鄉刑下以不孝爲首賈疏云上設三物教萬民民有不從教者則設刑以刑之上三物有六德六行六藝六德六藝不設刑獨於六行設刑者鄭注師氏云在身爲德施之爲行德爲在身不施於物六藝亦是在身之能不施於人故二者不設刑其行並是施之於人恐有愆負故設刑以防之也造言亂民民中特害故六行之外別加此二刑 注云糾猶督察也者小宰注義同云不弟不敬師長者孟子告子篇云徐行後長者謂之弟疾行先長者謂之不弟趙注云弟順也賈子道術篇云弟敬愛兄謂之弟周書謚法篇孔注云不悌不遜順也悌卽弟之俗案師氏二

行云二日友行以尊賢良三日順行以事師長依鄭說此不弟似兼含不順爲義但彼師長長當謂官長此注則似主長老而言義亦微異也賈疏云此不弟卽上六行友是也上文在陸姻之上此變言弟退在陸姻之下者上言友專施於兄弟此變言弟兼施於師長故退在陸姻之下云造言訛言惑敗者大宰注云造作也詩小雅河水民之訛言箋云訛僞也謂造作僞妄之言以惑敗聽禁暴氏禁庶民之作言語而不信者亦其類也云亂民亂名改作執左道以亂政也者王制云析言破律亂名改作執左道以亂政殺鄭彼注云亂名改作謂變易官與物之名更造法度左道若巫蠱及俗禁孔疏云廬云左道謂邪道地道尊右右爲貴故漢書云右賢左愚右貴左賤故正道爲右不正

道爲左案荀子正名篇云析辭擅作名以亂正名使民疑惑民多辨訟則謂之大姦其罪猶爲符節度量之罪也此卽言亂民之刑也又案禁暴氏禁庶民之亂暴力正者司赦掌市禁亦有戒亂之禁則亂民當亦兼有暴亂之民矣鄭司農云任謂朋友相任者上六行注云任信於友道者二鄭義同云恤謂相憂者詳前疏以五禮防萬民之僞而教之中禮所以節止民之侈僞使其行得中鄭司農云五禮謂吉凶賓軍嘉疏以五禮防萬民之僞而教之中者此卽十二教以祀禮教敬則民不苟以陽禮教讓則民不爭以陰禮教親則民不怨之事稻人云以防止水經解云夫禮禁亂之所由生猶坊止水之所自來也坊卽防之俗蓋防爲止水之隄引申爲防檢之義上六藝已略五禮六樂

但彼是教民興藝之事此更以禮樂教化萬民故別言之賁疏  
云案禮記樂記云禮者著誠去僞故以禮防萬民之僞而教之  
中使得中正也 注云禮所以節止民之侈僞使其行得中者  
王制云司徒脩六禮以節民性樂記云禮節民心白虎通義禮  
樂篇云禮所以防淫佚節其侈靡也上文十二教云以儀辨等  
則民不越教中即使之不越禮也鄭司農云五禮謂吉凶賓軍  
嘉者據大宗伯文王制云六禮冠昏喪祭鄉相見彼六者以事  
別與五禮亦互通也以六樂防萬民之情而教之和樂所以蕩  
正民之情思使其心應和也鄭司農云六樂謂雲門咸池大韶  
大夏大濩大武疏以六樂防萬民之情而教之和者此即十二  
教以樂教和則民不乖之事 注云樂所以蕩正民之情思使

其心應和也者樂記云樂和民聲又云樂也者可以善民心其  
感人深其移風易俗易白虎通義禮樂篇云樂所以蕩滌反其  
邪惡也卽蕩正民之情思使其心應和之事也鄭司農云六樂  
謂雲門咸池大韶大夏大濩大武者釋文韶作招云本亦作韶  
又云濩本亦作護案招韶護濩字並通詳大司樂疏凡萬民之  
不服教而有獄訟者與有地治者聽而斷之其附于刑者歸于  
士不服教不厭服於十二教貪冒者也爭罪曰獄爭財曰訟有  
地治者謂鄉州及治都鄙者也附麗也士司寇士師之屬鄭司  
農云與有地治者聽而斷之與其地部界所屬吏共聽斷之士  
謂主斷刑之官春秋傳曰士榮爲大士或謂歸于國土國土謂  
獄也獄城圖疏凡萬民之不服教而有獄訟者與有地治者聽



而斷之者賈疏云上以禮樂化民而萬民不厭服十二教則關  
爭起有獄訟者將斷割之時恐其獄訟不審故與其有地治者  
謂治民之官共聽而斷之云其附于刑者歸于士者以司徒雖  
掌鄉入刑而獄訟之事必屬之刑官也其官刑并罰以下則司  
徒專斷之賈疏云若有小罪則司徒決之其附於五刑則歸於  
士使秋官士師之等斷之 注云不服教不厭服於十二教貪  
冒者也者厭賈述注作厭疏云上以十二教教民使不貪冒其  
民有不厭服於十二教卽是貪冒之人也厭有二種有嫌厭有  
厭飲之厭謂若祭禮有陰厭之類是也此言不厭服十二教者  
謂不厭飲服行十二教也阮元云賈疏有嫌厭厭飲陰厭字皆  
作古厭字是賈氏所據卽注作厭也依說文厭服字當從厂案

阮校是也釋文厭於涉反或於驗反賈作獸與陸引或音同依陸前音則字當作厭說文厂部云厭竿也一日合也字亦作壓公羊文十四年何注云厭服也漢書刑法志云獄疑於人心不厭者輒獄之此與許書合義相近賈疏獸獸之訓恐非鄭意貪冒者左文十八年傳貪于飲食冒于貨賄杜注云冒亦貪也云爭罪曰獄者呂氏春秋孟秋紀高注同大司寇云以兩劑禁民獄注云獄謂相告以罪名者鄭意凡言獄者並謂以干犯罪名之事相告發或已有罪而抵誣他人若此者並謂之獄也云爭財曰訟者呂氏春秋高注同大司寇云以兩造禁民訟注云訟謂以財貨相告者說文言部云訟爭也易訟釋文引鄭易注云辯財曰訟玉燭寶典引月令章句云獄爭罪也訟爭辭也案爭

財謂以財貨取與相抵冒而告之官者然經凡獄訟對文者獄大而訟小也鄭謂以爭罪爭財爲異似非經義獄訟散文亦通詳大司寇疏云有地治者謂鄉州及治都鄙者也者賈疏云司徒主六鄉明知有鄉州也案上經布教於都鄙明地治之內兼有菴鄩可知諸議案鄭意此云有地治者猶遂大夫云屬其地治者亦猶蜡氏云有地之官在六鄉則爲鄉州之吏在采地則爲都鄙之吏此皆有聽獄訟之事故鄉師云各掌其所治鄉之教而聽其治又云聽其獄訟是也云附麗也者大司寇注云麗附也二字互訓附於刑猶言麗著於刑法也詳大司寇疏云士司寇士師之屬者司寇闕大小司寇與士師及其屬官皆刑官故通謂之士孟子梁惠王篇云士師不能治士趙注以不能治

獄爲釋則獄亦得稱士矣賈疏云案秋官有士師鄉士遂士縣士並主獄訟之事故云士師之屬也鄭司農云與百地治者聽而斷之與其地部界所屬吏其聽斷之者與後鄭說同部界所屬吏卽鄉州及治都鄙者也云士謂主斷刑之官者秋官敘官注云士察也主察獄訟之事者是其義也先鄭此義亦與後鄭同但汎言斷刑之官故後鄭補之引春秋傳曰士榮爲大士者僖二十八年左傳衛侯殺弟叔武元咺訴於晉諸侯會於溫以討之衛侯與元咺訟甯武子爲輔鍼莊子爲坐士榮爲大士杜注云大士治獄官也引之者證凡主斷刑之官並稱士也云或謂歸于國土者于當從賈疏述注作於此兼存別本別說謂書或作歸于土義則與司教三罰而歸于國土同也惠棟曰鄭以

古土字有作士者故復以圜土釋之詩周頌云保有厥士義作  
土世本作篇云相土作乘馬即相土也呂覽任地云后稷曰子  
能使吾士靖而剛浴士乎高誘曰士當爲土周牧敦亦以士爲  
土云圜土謂獄也獄城圜者比長注云圜土者獄城也獄必圜  
者規主仁以仁心求其情古之治獄閱於出之司救及秋官敘  
官先鄭注義並同初學記政理部引春秋元命包云爲獄圜者  
象斗運合釋名釋宮室云獄圜也言實殫人情僞也又謂之圜  
土言築土表牆其形圜也史記天官書云有句圜十五星屬杓  
曰賤人之牢即獄城圜之象月令孔疏引鄭記崇精問曰獄周  
曰圜土殷曰羑里夏曰均臺詩召南行露孔疏云鄭異義駁云  
獄者圜也囚證於圜核之處周禮之圜土然則獄者核實道理

之名皋陶造獄謂此也既囚證未定獄事未決繫之於圜土因  
謂圜土亦爲獄案孔說是也此經凡言圜土者並爲頌繫罷民  
之獄司救大司寇司圜所掌是也其五刑之囚則自繫鄉士遂  
士縣士諸官之獄不入圜土月令孟春省圜圜注云圜圜所以  
禁守繫者若今別獄矣白虎通義獨斷及玉燭寶典引風俗通  
並云獄周曰圜圜明圜土非周獄之正名又墨子尚賢下篇說  
傳說居圜土之上則殷獄羑里之外亦別有圜土其制不始於  
周鄭記崇精問似謂周凡獄通名圜土殊失攷祀五帝奉牛牲  
羞其肆牛能任載地類也奉猶進也鄭司農云羞進也肆陳骨  
體也立謂進所肆解骨體土喪禮曰肆解去蹄疏祀五帝奉牛  
牲者太宰注云祀五帝謂四郊及明堂大司徒奉牛牲與大宗

伯大司馬大司寇大司空爲官職小宗伯云毛大牲辨其名物而頒之于五官使其奉之是也經言五帝而不及昊天上帝及方丘北郊者文不具也凡郊丘五帝並用犢餘神則用牛通謂之牛牲小司徒凡小祭祀奉牛牲注云小祭祀王立冕所祭依彼注義則凡中祀王希冕所祭以上之牛並大司徒奉之矣然則此官所奉甚衆經唯舉五帝以見義耳 注云牛能任載地類也者庖人注云牛屬司徒土也易說卦傳云坤爲牛孔疏云坤象地任重而順故爲牛也又月令注云牛土畜也孔疏引洪範五行傳云思之不睿則有牛禍注云地厚德載物牛畜之任重者也屬思義與此注同云奉猶進也者說文(付)部云奉承也引申爲進奉之義廣雅釋詁云奉進也大司寇小司寇注並同

鄭司農云羞進也者膳夫注同云肆陳骨體也者春官敘官注  
云肆猶陳也謂陳骨體爲俎實賈疏云骨體肩臂脊脅之屬司  
農以肆爲四音讀之故云肆陳也謂陳牲體於俎上卽體解折  
節爲二十一體是也案賈說非也詩小雅楚茨或肆或將毛傳  
云肆陳也箋云有肆其骨體於俎者先鄭卽本毛義小子羊肆  
先鄭注云羊肆體薦全烝也依左傳杜注國語韋注義則體薦  
半解牲體而薦之全烝爲全升牲體而不解先鄭小子注別以  
體解節折釋羊殺則不以肆爲體解二十一體可知矣云玄謂  
進所肆解骨體者後鄭從先鄭訓羞爲進而不從其訓肆爲陳  
也小子羊肆注云肆讀爲羴羊羴者所謂豚解也是後鄭讀肆  
爲羴羴解卽豚解也據大宗伯典瑞注義則肆者爲凡解牲體



之通名豚解體解皆謂之肆而視五帝自血腥始則當先進豚解以此下注特引士喪禮豚解之法以證義小子經則羊肆與羊殺對文故彼注亦專舉豚解爲釋二注意異而義同也凡豚解解左右股肱脊及兩脅爲七體詳小子疏引士喪禮曰肆解去蹄者士喪禮云特豚四髣去蹄鄭彼注云髣解也四解之殊肩髀而已案殊肩髀卽解左右股肱爲四也彼下文又云兩肱脊注云肱脅也卽所謂七體賈疏云彼言殊肩髀與此骨體一也但彼云四髣此云肆解其字不同者鄭直以義讀之非彼正文此云肆當彼髣也案禮運云腥其俎孰其醢彼注云腥其俎謂豚解而腥之也孰其醢謂體解而爛之祭祀之法先豚解後體解經云奉牛牲謂初牽入時卽言羞其肆明先豚解又案圖

語禘郊之事則有全烝若然則禘郊之事先全烝始後豚解也  
若宗廟之祭則無全烝先豚解次體解禮運所云者是也何紹  
基云釋文肆訛厯反注肆解肆去同案注引士喪禮蓋以肆易  
髣當作四肆去蹄賈疏誤作肆解去蹄者因上句肆解骨體而  
誤也釋文肆去二字足正其誤案何校是也孔繼汾說同俞樾  
云此注此疏均有誤字蓋鄭意肆卽髣之段字其義爲解故注  
士喪禮以四解說四髣而此注則以肆解連文也肆解者以解  
訓肆也乃引士喪禮曰肆解去蹄本作四肆去蹄蓋謂此經之  
肆卽彼經之髣也故易彼經之正文從此經之段字使讀者易  
曉此古人引經明段借之又一例也賈疏本作但彼云四髣此  
云四肆其字不同蓋所異者止肆之一字故曰此云肆當彼髣

也注文涉上有肆解字誤作肆解去蹄後人又改賈疏以從之其誤遂不可正矣案賈疏亦當如俞校內饗疏引士喪禮四肆去蹄卽依此注是賈所見本與陸同之證士喪禮之影正字當作翦詳小子疏享先王亦如之疏享先王亦如之者賈疏云享先王不辨祭之大小彼大宗伯四時及禘祫六者皆稱享云亦如之者亦如上祀五帝奉牛牲羞其肆又不言祭地者祭地之禮與天同大賓客令野脩道委積令令遣人使爲之也少曰委多曰積皆所以給賓客疏大賓客令野脩道委積者賈疏云案大行人諸侯朝稱賓鄉大夫來聘稱客彼對文例散文賓客通此云人賓客者唯據諸侯來朝大司徒令遣人於野路之上脩治道塗及委積芻薪米禾之等以待賓客案賈說是也此云大

賓客小司徒云小賓客皆君臣相對爲大小其賓客則自不別  
大行人注云大賓要服以內諸侯大客謂其孤卿與此義別彼  
大客仍在小司徒小賓客內此大賓客內亦當含要服以外蕃  
國來朝之小賓也野謂自四郊以至於畿遣人云郊里之委積  
以待賓客是也賈云脩治道塗者蓋據逐人云凡賓客令脩野  
道而委積逐師云賓客則巡其道脩庀其委積注云巡其道脩  
行治道路也以彼一文證之則此經謂道路及委積二者兼令  
脩之非止謂脩道上之委積也但遣人不掌脩道涂之事故方  
苞蕭載康並謂脩道自大小司徒以及逐人逐師皆令野廬氏  
其說足補鄭賈之義 注云令遣人使爲之也者賈疏云案  
遣人云十里有廬廬有飲食二十里有宿宿有路室路室有委

周禮正義

禮十九

五十一卷 經學社本

五百四十六

五十里有市市有候館候館有積故知義然也黃度云鄭云令  
遣人以遣人掌委積也脩道非遣人之事案黃說是也云少曰  
委多曰積者遣人注同賈彼疏云據三十里言委五十里言積  
相對而言若散文則多亦曰委委人所云薪蒸亦曰委是也案  
賈說是也說文禾部云積聚也廣雅釋詁云委積也蓋委積義  
同凡儲聚禾米薪芻之屬通謂之委積九章算術商功篇有算  
委粟委菽委米及芻粟芻章術皆有積是也鄭謂多少異名據  
遣人職爲說耳又案國語周語云野有庾積章注云庾露積穀  
也詩小雅篤公劉云迺積迺倉蓋積本爲露積之名總言之凡  
倉廩之屬亦稱積遣人云候館有積掌戮云兇者使守積皆通  
含倉廩不皆露積也云皆所以給賓客者若遣人路室有委候

館有積及司儀云上公五積侯伯四積子男三積等皆以給賓客行道之用也大喪帥六鄉之眾庶屬其六引而治其政令眾庶所致役也鄭司農云六引謂引喪車案也六鄉主六引六遂主六紼疏大喪帥六鄉之眾庶屬其六引者以下掌致民治役之事大喪謂王及后之喪后與王禮略同葬當亦得用六引也世子喪蓋不備六引則此大喪不得闕世子以下但其用役亦取之鄉遂則亦大小司徒遂人等致之矣案遂師道野役及蜃車之役注謂司徒使之稍人云大喪帥蜃車與其役以至以聽於司徒是自鄉遂以至公邑其役政咸受治於司徒以其掌六鄉地事尤爲親切故經唯著帥六鄉眾庶之文若其徵令所及實通於畿內矣又案少儀云適公卿之喪則曰聽役於司徒則

疑公卿大臣之喪司徒亦使其屬官治其役事但不親其事耳  
屬六引者謂葬行時屬引索於柩車之軸以便挽引既夕禮云  
乃載屬引注云屬猶著也 注云衆庶所致役也者遂人注云  
大喪之正棺殯啟朝及引六鄉役之卽此衆庶其其役也賈疏  
云但六鄉七萬五千家唯取一千人致之使爲挽柩之役鄭司  
農云六引謂引喪車索也者既夕禮注云引所以引柩車在軸  
輜曰縵古者人引柩春秋傳曰坐引而哭之二三案喪車卽巾車  
之匿路遂師之蜎車也引與縵同爲大索惟以舉棺引車爲異  
詳遂人疏又遂人六綽注云用紼旁六則此六引亦用引旁六  
云六鄉主六引六遂主六縵者縵縵同賈疏云案遂人職云大  
喪帥六遂之役而致之掌其政令及葬帥而屬六綽在棺曰縵

見龜體行道日引見用力互文以見義也  
大軍旅大田役以旗致萬民而治其徒庶之政令  
旗盡熊虎者也徵衆刻日樹旗期於其下  
**[疏]**大軍旅大田役以旗致萬民而治其徒庶之政令者  
卽大宗伯軍禮之大師大田也因大田而起徒役謂之大田役  
亦略有大役之事詳大宰疏賈疏云凡征伐田獵所用民徒先  
起六鄉之衆司徒主六鄉田卽治其徒庶之政令  
注云旗畫熊虎者也者據司常文云徵衆刻日樹旗期於其下者釋名釋  
天文云熊虎爲旗旗期也言與衆期於下說文旗部云熊旗五旗  
以象罰星士卒以爲期案旗期聲同明用旗兼取期衆之義賈  
疏云凡起徒役不令而誅謂之虐故徵衆庶預刻集日至日樹  
旗期民於其下衆皆至弊旗誅後至者也  
肅宗義云朝人云熊



旗六旂遂大夫四命四旂鄉大夫六命則爲六旂案依彙說則大司徒大旗亦當六旂司常大閼云孤卿建旌帥都建旗大司馬治兵又云軍吏載旗百官載旗大司徒卿常法宜建旗旌今以師田用軍法且司徒在軍或卽爲軍將故改建旗旌但凡鄉遂致民皆以大旗似義取表事與司常大閼大司馬治兵敘爵不同則不定爲軍將而期民通用旗故鄉師時田云及期以司徒之大旗致眾庶遂人起野役亦云以遂之大旗致之義並略同孟子萬章篇說招庶人以旗疑卽用旗旌也互詳鄉師遂人庶若國有大故則致萬民於王門令無節者不行於天下大故謂王崩及寇兵也節六節有節乃得行防姦私疏則致萬民於王門者於經例當作于石經及各本並誤下同致民者以備非

常飭守政萬民亦專指六鄉之正卒非通國中四郊之民盡致之也王門卽王宮之皋門庫門虎賁氏所守者對司門國門爲城門覲禮記云偏駕不入王門亦是也致萬民蓋於皋門內外屬衆而待事國語吳語云越王命有司大令於國曰苟任戎者皆造於國門之外彼將興兵征伐故致民於國門此大故備守則致民於宮門緩急事異也云令無節者不行於天下者謂令鄉遂都鄙及邦國也司險云國有故則藩塞阻路而止行者以其屬守之唯有節者達之此官蓋亦兼令之矣 注云大故謂王崩及寇兵也者朝士云若邦凶荒札喪寇戎之故此下文荒札別見故注不及也司險注云有故喪災及兵也此大喪及大兵事則謂之大故虎賁氏云國有大故則守王門大喪亦如之彼

詳言之故大喪與大故並舉此通言之則大故亦得含大喪經  
注詳略不嫌互見也云節六節者據小行人六節達於天子者  
也云有節乃得行防姦私者姦宋本嘉靖本作姦卽姦之俗有  
節以檢察誣僞則姦私不得售也大荒大札則令邦國移民通  
財舍禁弛力薄征緩刑大荒大凶年也大札大疫病也移民辟  
災就賤其有守不可移者則輸之穀春秋五年夏歸粟於蔡是  
也疏大荒大札則令邦國移民通財者此與上十二荒政略同  
彼舉其條目此施其政令又大札亦有此令故復著之也賈疏  
云令邦國者謂令天下諸侯邦國也移民謂分口往就賤財是  
米穀也其有留守不得去者則賤處通穀米與之云舍禁弛力  
薄征緩刑者並詳前疏賈疏云若據大荒則全無征税今言薄

征者容有小荒仍征稅

注云大荒大凶年也者大宰注云荒

凶年此災尤重故曰大荒云大札大疫病也者膳夫注云大札疫病也與此義同云移民辟災就賤者說文禾部云移禾相倚移也又足部云迢遷徙也經典通假移爲迢大札則徙民避災大荒穀貴則徙民就穀賤之處使易得食廩人云若食不能人二隴則令邦移民就穀卽就賤也孟子梁惠王篇梁惠王曰河內凶則移其民於河東移其粟於河內卽大荒移民之事云其有守不可移者則輸之穀者前注云財謂泉穀故輸穀謂之通財有守謂有地守或者稚守田宅不能移者則輸穀以闢其見孟子之移粟是也小行人云若國札喪則令賻補之若國凶荒則令賻委之亦卽札荒通財之事云春秋定五年夏歸粟於蔡

是也者春秋經文先是定四年秋楚人圍蔡故此年夏歸之粟  
左傳云歸粟於蔡以周亟矜無資賈疏云彼雖非荒札之事直  
取歸粟一道證經通財之義歲終則令教官正治而致事歲終  
自周季冬也教官其屬六十正治明處其文書致事上其計簿  
**疏**歲終則令教官正治而致事者此正教官之歲會所謂官計  
也 注云歲終自周季冬也者宰夫注同此經通例凡言歲者  
並據夏正歲終實當爲夏之季冬卽以爲周季冬非也詳宰夫  
疏云教官其屬六十者地官所屬之凡數也云正治明處其文  
書者大宰歲終則令百官府各正其治注云正正處也謂明審  
處制其文書也云致事上其計簿者小宰歲終則令羣吏致事  
注云使齊歲盡文書來至若今上計計簿卽歲盡上計之文書

也正歲令于教官曰各其爾職脩乃事以聽王命其有不正則國有常刑正歲夏正月朔日疏正歲令于教官者此就教官之屬各官府申教之與小司徒觀教法時所令不同詳後疏云曰各其爾職脩乃事以聽王命者猶小宰令治官云各脩乃職攷乃法待乃事以聽王命也云其有不正則國有常刑者賈疏云謂文書不正直而濫失則有常刑案常刑詳小宰疏 注云正歲夏正月朔日者小宰注云正歲謂夏之正月賈疏云知是朔日者以其正月之吉是朔日此雖不言之吉亦是朔日爲始可知也

周禮正義卷十九終